



2016 yil "28" mart № 104

Farg'ona shahri

**Вилоят худудида қишлоқ хўжалиги экинзорларининг  
пайҳон қилинишига барҳам бериш тўғрисида**

Ўзбекистон Республикаси Вазирлар Маҳкамасининг 2008 йил 10 декабрдаги "Қишлоқ хўжалиги экинзорларининг пайҳон қилинишига қарши курашишни кучайтириш чора-тадбирлари тўғрисида"ги 272-сон қарори ижросини таъминлаш мақсадида ҳамда "Маҳаллий давлат ҳокимияти тўғрисида"ги Ўзбекистон Республикаси Қонунининг 6, 25-моддаларига асосан

**ҚАРОР ҚИЛАМАН:**

1. Қишлоқ хўжалиги экинзорларининг пайҳон қилинишини олдини олиш тартибини ва зарар миқдорини белгилаш тўғрисидаги қоидалар (кейинги ўринларда-Қоидалар) иловага мувофиқ тасдиқлансин.

2. Вилоят Ички ишлар бошқармаси (Султанов), вилоят Қишлоқ ва сув хўжалиги бошқармаси (Махмудов), туман (шаҳар) ҳокимликлари мазкур қарор билан тасдиқланган Қоидаларга қатъий риоя этилишини ўз назоратига олсинлар.

3. Туман (шаҳар) ҳокимлари ушбу қарор билан тасдиқланган Қоидалар талабларини амалга ошириш юзасидан зарурий чора-тадбирларни белгиласинлар ва ҳар ой якуни билан ушбу масалани муҳокама этиб борилишини таъминласинлар;

қишлоқ хўжалиги экинзорларида мол боқиш ва молларнинг, автотранспорт ёки қишлоқ хўжалиги техникаларининг экинзорлар орқали ўтиши ҳамда экинларнинг пайҳон бўлишига олиб келувчи бошқа қонун бузилиш ҳолатларига қарши курашиш ишларини кучайтирсинлар.

4. Вилоят ҳокимининг ўринбосари (Рахимов), вилоят Қишлоқ ва сув хўжалиги бошқармаси (Махмудов)га жойларда Қоидалар талаблари бажарилишини таъминлаш мақсадида жорий йил апрел ойининг биринчи ўн кунлигида худудларда фермер хўжаликлари, маҳалла ва қишлоқ фуқаролар йиғинлари раислари иштирокида кенгайтирилган семинар йиғилишларни ўтказиш топширилсин.

5. Мазкур қарор "Фарғона ҳақиқати" ва "Ферганская правда" газеталарида расмий эълон қилинсин ҳамда вилоят ҳокимлигининг расмий веб-сайтига жойлаштирилсин.

6. Ушбу қарор расмий эълон қилинган кундан бошлаб кучга киради.

7. Мазкур қарорнинг ижросини назорат қилиш вилоят ҳокимининг ўринбосари А.Рахимов зиммасига юклатилсин.

**Вилоят ҳокими****Ш. Ғаниев .**

**Қишлоқ хўжалиги экинзорларининг пайҳон қилинишини олдини олиш  
тартибини ва зарар миқдорини белгилаш тўғрисидаги  
ҚОИДАЛАР**

Мазкур Қоидалар Ўзбекистон Республикаси Вазирлар Маҳкамасининг 2008 йил 10 декабрдаги “Қишлоқ хўжалиги экинзорларининг пайҳон қилинишига қарши курашишни кучайтириш чора-тадбирлари тўғрисида”ги 272-сон қарори (Ўзбекистон Республикаси қонун ҳужжатлари тўплами, 2008 й., 50-сон, 497-модда) ижросини таъминлаш ҳамда вилоятда қишлоқ хўжалиги экинларининг пайҳон қилиниши ва нобуд бўлишининг олдини олиш муаммоларига барҳам беришни, ўзини ўзи бошқариш органлари ҳамда қишлоқ хўжалиги корхоналарининг ушбу долзарб масалага тўла жалб қилинишини ва уларга нисбатан талабчанликни кучайтиришни, шунингдек ҳуқуқни муҳофаза қилиш идоралари томонидан экинзорларнинг пайҳон қилинишига йўл қўймаслик юзасидан етарли чора-тадбирлар кўриш тартибини белгилайди.

Қишлоқ хўжалиги экинларининг пайҳон қилинишига шаҳар ва туманлар ҳудудида таъсирчан чораларни кўриш, қишлоқ хўжалиги экинлари, аввало риску-рўзимиз бўлмиш ғалла майдонларини пайҳон қилинишининг олдини олиш ва нобуд бўлиши ҳолатларига йўл қўймаслик юзасидан амалга оширилаётган тадбирлар самарадорлигини ошириш ҳамда ушбу масалада тегишли идоралар раҳбарларининг масъулиятини янада кучайтириш орқали амалга оширилади.

**I. Умумий қоидалар**

1. Қоидаларда қўйидаги асосий тушунчалардан фойдаланилади:

Экинзорлар деб: пахта, ғалла, бедазорлар, сабзавот ва полиз ҳамда чорвачилик озуқа экинлари ва бошқа (юридик ва жисмоний шахсларнинг даромад олиш мақсадидаги барча экинлари,) экинзорлар тушунилади.

**II. Қишлоқ хўжалиги экинзорларининг пайҳон қилинишига  
барҳам бериш бўйича кескин чоралар**

2. Экинзорлар, шу жумладан давлат эҳтиёжлари учун экиладиган экин майдонларини кўплаб пайҳон қилиниши мумкин жойларда ердан фойдаланувчиларни жалб этган ҳолда кузатиш постлари ташкил қилинади.

3. Қишлоқ ва сув хўжалиги бошқармасининг туман (шаҳар)даги бўлимлари, ички ишлар бўлимлари, фуқароларнинг ўзини ўзи бошқариш органлари билан ҳамкорликда, жамоатчиликни кенг жалб қилган ҳолда мунтазам рейдларни тизимли асосда ташкил этилади, экинзорларни пайҳон қилиш ҳолати аниқланган тақдирда, фуқароларга энг кам иш ҳақининг бир бараваридан уч бараваригача, мансабдор шахсларга эса, **уч бараваридан беш бараваригача миқдорда жарима солишга сабаб бўлади.**

Экинзорларни ёки кўчатзорларни ҳамма турдаги ҳаракатланувчи техника воситаларида босиб ўтиш энг кам иш ҳақининг уч бараваридан беш бараваригача миқдорда жарима солишга сабаб бўлади.

Ҳуқуқбузарликлар маъмурий жазо чораси қўлланилганидан кейин бир йил давомида такрор содир этилган бўлса, фуқароларга энг кам иш ҳақининг беш бараваридан етти бараваригача, мансабдор шахсларга эса, беш бараваридан ўн бараваригача миқдорда жарима солишга сабаб бўлиши белгилаб қўйилсин.

Ушбу ҳуқуқбузарлик учун белгиланган жарима билан бир қаторда экинзорларни пайхон қилиш оқибатида келтирилган зарар айбдор шахс ҳисобидан қопланади.

4. Фуқаролар ва юридик шахслар томонидан етказилган зарарлар ва қўлланилган жарималар ихтиёрий равишда уч ой муддатда қопланмаган тақдирда, далолатнома асосида олинган чорва моллари, транспорт воситалари, қишлоқ хўжалиги техникалари ва нобуд қилишнинг бошқа воситалари суднинг қарори асосида ҳал қилинади.

5. Экинзорларнинг пайхон ва нобуд қилиниши ҳолатлари аниқланган тақдирда барча чорва моллари, автотранспорт, қишлоқ хўжалиги техникаси ёки экинзорларни пайхон ва нобуд қилишнинг бошқа воситалари тегишли далолатнома асосида олиб қўйилади ҳамда етказилган зарар тегишли мутахассислар томонидан аниқланиб, зарар ва жарималар қоплангандан сўнг қайтариш масаласи кўриб чиқилади.

6. Фермер хўжаликлари ва бошқа қишлоқ хўжалиги маҳсулотларини етиштирувчи ташкилот ва корхоналарининг тасарруфидаги ер майдонлари ва экинзорларда наша, ёввойи наша ва мойли кўкнор экинларини йўқ қилиб юборилади.

7. Жойларда қишлоқ хўжалиги экинзорларининг пайхон қилинишига қарши курашиш бўйича ишларни ташкил этиш юзасидан шахсий жавобгарлик туман ҳокимлари, ички ишлар бўлимлари бошлиқлари, шунингдек тегишли ташкилотлар раҳбарлар зиммасига юкланади.

8. Фермер хўжаликлари, давлат корхонаси, ташкилоти ва муассаса раҳбарлари ўз ҳудудларида экинзорларни пайхон қилинишини олдини олиш бўйича масъул этиб тайинланади, вазифасига совуққонлик билан муносабатда бўлган ҳамда пайхон қилиш ва зарар етказилишини олдини олмаган тақдирда, ҳокимликлар томонидан ваколати доирасида мансабдор шахсларга нисбатан кескин чоралар кўрилади.

9. Фермер хўжаликлари ва ердан қишлоқ хўжалиги маҳсулотларини етиштириш мақсадида фойдаланувчиларнинг чорва ҳайвонлари доимий ўтадиган экинзорлари атрофини махсус (четан) тўсиқлар билан жиҳозлайдилар.

10. Фермер хўжаликлари ва бошқа қишлоқ хўжалиги маҳсулотларини етиштирувчи ташкилот ва корхоналари ўз ҳисобларидан экинзорларни пайхон қилинишини олдини олиш учун амалдаги қоидалар асосида мавсумий дала қоровулларни тайинлаш тавсия этилади.

11. Вилоят Ички ишлар бошқармаси қишлоқ хўжалик экинларининг пайҳон қилиниши ва нобуд бўлишининг олдини олиш юзасидан ташкилий профилактик тадбирларни мунтазам равишда ўтказиш ҳақида қўшимча тадбирлар белгилайди.

12. Шаҳар, туман ҳокимлари мулкчилик шаклларида қатъий назар, хўжаликларнинг ҳамда улар таркибий бўлинмаларининг экинларни сақланишини таъминламаган ва уларнинг пайҳон бўлишига йўл қўйган раҳбарларига нисбатан қонунчиликда белгиланган тартибда жавобгарликка тортиш чораларини кўради.

### **III. Яқунловчи қоидалар**

13. Мазкур Қоидаларнинг бузилишида айбдор бўлган шахслар қонун ҳужжатларида белгиланган тартибда жавобгарликка тортилади.